

四庫全書

集部

欽定四庫全書

集部  
鯤溟詩集卷二

詳校官監察御史

臣周元良

侍讀

臣孫球覆勘

總校官進士

臣楊懋珩

校對官助教

臣胡予襄

謄錄監生

臣馬步蟾

欽定四庫全書

集部六

鯤溟詩集

別集類五

明

提要

臣等謹案鯤溟詩集四卷明郭諫臣撰諫臣字子忠長洲人嘉靖壬戌進士官至江西叅政初為袁州推官時憤嚴氏亂政乃密籍嚴世蕃奸逆不道事因御史林潤上之世蕃遂伏法及轉吏部主事遷員外郎數上書論列

時事語多切直又與張居正忤乃有江西之  
命甫三月即自劾歸其生平抗直不愧其名  
與字而其詩乃婉約閒雅有范成大陸游之  
遺雖十首以外不免語意畧同如高仲武之  
論劉長卿者然當太倉厯城主持壇坫之時  
能毅然不隨風氣而轉亦足見其孤介矣是  
集為其子元望所編凡詩六百七十一首又  
附奏疏二篇集中無與王世貞唱和詩故世

貞作序謂交久而幾失之復稱其詞咸調暢  
清麗句穩而字安不露蹊徑而近體尤渾渾  
可詠蓋亦重其為人不以門戶之異為嫌也  
世貞謂其詩可千餘首此集不知誰所刊定  
其亦出世貞之手歟初刻于萬歷中此本為  
其五世孫鸞重刊而陳鵬年為校定云乾隆  
四十三年六月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

鯢溟詩集卷一

明 郭諫臣 撰

春日遊天池山和天水胡公韻

天半孤峰削出奇蓮花倒影入天池晴雲暖護池邊竹  
芳草春深石上碑霞彩盪空山欲動松陰滿地日初移  
仙源坐久渾忘倦莫怪遊人歸去遲

長蕩舟行

蘆葦煙消兩岸青湖光浩蕩水雲平晴波遠弄青山色  
綠柳新添黃鳥聲濁酒貫來緣有約殘英落盡自無情  
西山此去偏多興蔽蕨離離遶澗生

送從兄宗義戍龍里

萬水千山行路難落花啼鳥靜中看長途有客頻回首  
故國無人獨倚闌荒戍城邊騏驎老夕陽江上鶴鴒寒  
白雲南去蠻鄉近笑倚吳鉤天地寬

仲夏寄覺海玘公



不見旻公久時時憶草堂修篁環徑密幽草徧山長絕  
壁雲凝墮奔流水自忙依依舊遊處相約在重陽

英氣歌

男兒挺生天地間英雄激烈如邱山養育成就在磨礪  
間關百折胡厚顏巾幗之遺不足恥綠林之輩不足死  
會須一忍在萬全方是英雄好男子君不見應侯昔為  
魏相客青蠅白壁遭讒賊拉脅折齒佯死餘使車猥載  
來秦國立談勇略萬乘傾相權赫赫諸侯驚仇人亡命

終授首故人聊惜綈袍情又不見王孫昔日未遇時淮  
陰年少爭相欺俛首俯伏出胯下一市嗤笑無能為誰  
知事漢擒楚猴油幢虎帳臨淮流百辱仍將中尉報一  
飯豈惜千金酬丈夫落落心千古悻悻小輩何足數乃  
知能屈始能伸古來如此非獨我

春日山房有客過訪因留宿別

芳林日出翠煙消無限春心寄柳條紅雨池塘遊蝶醉  
綠陰庭院語鶯嬌半窗殘月論文夜一枕微醺中酒朝

感爾相過又相別  
青青酒旆映河橋

春日睡起

杏花庭院晝遲遲  
睡起初驚燕語時  
遍倚曲闌無限思  
游絲閒駐海棠枝

雨中新柳

弱柳絲絲帶雨垂  
隔窓淡掃素娥眉  
等閒莫向河橋折  
一縷常懸萬里思

想山中新茶

酒渴時思茗一杯玉川風味許相陪  
金芽欲吐無消息  
驚破江南昨夜雷

山窓雨夜話舊

不到西山久空門閉綠苔喜從燈下語  
疑是夢中來舊  
雨三年別新詩五夜裁老僧新釀熟  
對客一尊開

春日訪友雪阻不果

故人連卧病久不共高歌欲訪寒梅信  
其如雨雪何蹇  
驢無處覓短樵數能過試檢吟囊裏  
新詩積幾多

春日與客同飲江亭

春風攜客上江亭  
萬頃波光洗眼明  
雲樹遙從天外落  
風帆如在鏡中行  
夜深不厭頻催句  
興到還應數舉觥  
指點蓬瀛那可見  
掀髯長嘯大江橫

飛絮詞

楊花如雪舞晴空  
飄泊隨風恰似儂  
願化浮萍逐流水  
與君千里或相逢

天街步月口占

天街露冷思難禁對月空懸萬里心故國此時方搗練  
滿庭梧影夜深沉

睡起

客舍蕭條日正長綠窓夢破黃鸝語分明身在故鄉遊  
枕上思親淚如雨

自儀真舟行大江

水拍春空一鏡明畫船風捲片帆輕金山雲護江心寺  
鐵瓮天低京口城兩岸樹搖煙浪濶中流日照海潮平

晚來忽聽傳呼語知有江南津吏迎

夜抵九江

譙鼓已三更孤舟載月明風霜千里客星漢九江城水  
淨飛帆影天空落鴈聲暗思高卧者潦倒夢初驚

早春日新喻道中

雨洗川原一望新宦遊風物易傷神閒花似笑忙歸客  
新燕還尋舊主人遠樹妝成天外景飛花流出洞中春  
滿懷佳況應難遣典却春衣莫論貧

山中聞子規

草深山徑馬行遲  
兩岸豐林叫子規  
行客驟聞心獨慘  
無端忽起故園思

永新道中

亂山高下幾重重  
歷徧巉巖出險中  
平地起雲疑是嶂  
夕陽射雨漸成虹  
飛泉百道奔寒澗  
高塔千尋挿遠空  
堪歎薄遊無定迹  
馬蹄終日自西東

送別故友歸吳中



童稚論交三十年君今落魄困儒冠薄遊空慕林宗義  
逆旅誰知范叔寒江濶孤舟行樹杪天空一雁落雲端  
相逢不久又相別今夜月明何處看

正月十一途中念家君初度偶成

宦遊終日馬蹄忙偶見梅花憶故鄉春酒熟時歸未得  
一樽誰與進高堂

舟中曉起

兩岸桃花夾水流一樽時醉木蘭舟多情最是春夢

夜夜遙從故國遊

新月

新月如弓曲未平清光照我入孤城  
當空桂影渾疑見繞路松陰解送行  
三五漸從今夜滿尋常還是故鄉明  
無端忽被微雲掩誰識嫦娥一片情

瑞州公館月夜有懷

柳梢新月照孤城花氣薰人入夜清  
遙想閨中春寂寞有人對月漫含情

登廬山凌虛閣

高閣玲瓏倚太虛恍然身若在蓬壺  
開窓夜欲捫牛斗俯檻時看走兔  
烏林外天花凝寶樹簷前仙靄擁香  
爐憑高極目秋天遠漢水湘山半有  
無

九日江州諸公相約登高不果

木落天高秋氣清黃花開滿九江城  
無緣得遂登高興空負江州刺史情

樂平道中秋晚

山行林末見殘曛暝色催人漸不分幾點亂鴉歸暮堞  
一行征鴈叫秋雲煙高野燒連空起風急樵歌隔隴聞  
終日驅車馬道薄遊多愧北山文

自樂平過德興縣道經梅巖洞停輿入遊內有龍  
耳臥龜石鹿石燕仙田覆船諸物因賦二律

山行逢野叟引我入仙源龍耳浮雲氣龜文雜蘚痕  
來多歲月別置一乾坤去後重回首煙霞鎖洞門

紆曲空山道深藏古洞天鶴巢千歲樹龍滴四時泉無

復燒丹竈空餘種玉田掛冠來此隱儘可學延年

鄱湖舟中翫月

千里鄱湖一櫂過水輪倒影湧金波客中對景生佳況  
醉後臨流發浩歌坐愛清輝浮玉宇遙看素練引銀河  
廣寒夜靜無人到辜負嬋娟奈爾何

春日分宜縣喜遇楊少府南歸

去值潯陽月歸當秀水春相看今日面猶是隔年人高  
閣聊同眺清尊不厭頻別離情萬種驚見二毛新

七夕舟次楊村

燕闕天高暮雨收青錢沽酒醉蘭舟  
蓼花曲岸迴殘照禾黍西風動早秋  
三載空成南國夢一官還向上林游  
遙思今夜吳門月幾處穿針閱女牛

九日同省中諸友遊天壇道院

雨餘秋色滿金臺九日聊因選勝來  
紫陌馬行苔徑滑仙源犬吠竹門開  
登高幾負茱萸約對客頻傾竹葉杯  
既醉迴瞻天闕近九重佳氣鬱三台

天街月夜

天街月色似中秋水接長空上下浮  
遙憶故園那可見  
一聲寒雁過南樓

雨後自都門赴昌平途中覽勝漫賦

秋郊晨出雨初晴馬首燕山入  
漢清紫塞北臨千里磧  
玉河南遠九重城漢家陵寢風雲護  
昭代山河日月明  
晚向昌平一回首騰騰王氣擁神京

晚發昌平望京師

祀罷諸陵逐曉回遙瞻旭日照金臺香輪旋輶平沙軟  
仙旆晴披宿霧開秋色先從邊塞老山光還遶帝城來  
一官願效山公啓三賦慚非杜甫才

省中秋晚即事

斜日薄西山幽齋夢初醒窓虛隙照明室靜爐煙冷老  
圃帶秋容疎林淹暮景省中出每遲松落空階影

送辛黃二民部同年奉使江浙監兌

朝罷金門夜已闌行行使節向江干身離禁苑香初散



手捧天書墨未乾  
明月孤舟人並往  
福星一路衆爭看  
東南民力君知否  
好為蒼生著意寬

早春日朝賀穆宗即位

王氣絀縕照紫薇  
明堂重見漢官儀  
雲移仙仗趨丹陛  
風送爐香下玉墀  
日色旋臨鳩鵲觀  
春光先到鳳凰池  
太平天子開新歷  
應遣皇華四牡馳

春晚省中書感簡許司封同年

東風撲面動微和  
春服初成試越羅  
城背暖消殘雪盡

林梢晴帶夕陽多眼前物態看來變鏡裏光陰老去何  
肯謝榮名似君少扁舟湖上傲煙波

與銓省諸公觀漱玉泉流觴酣飲

四山環列翠雲屏坐對清泉醉欲醒詩就香山追洛社  
觴飛曲水續蘭亭仙源晝永花逾白輦路春深草自青  
盛世風光莫虛度閒中華髮漸星星

觀永陵工作

新作陵園枕薊門衆山來勢自崑崙也知月窟羣龍偃

驚見天衢萬馬奔王氣騰霄微復見峰嵐映日吐還吞  
司空欲倣前朝制光武遺謀今尚存

春日左闕門宴罷閒坐掖舍即事

宴罷宮門午漏遲掖垣花發萬年枝晴牕燕語黃金屋  
春水鷗眠碧玉池麗日垂輝薰細草東風無力曳游絲  
微臣幸際清平世願播陽和及海涯

春日恭送世宗梓宮赴山陵

帝子乘龍去鼎湖空餘仙馭出皇都沙堤雨灑千官淚

松壑風傳萬姓呼徒有燕姬悲甲館恨無方朔問蓬壺  
追思四十年來事只少東封按赤符

自都門北望永陵有感

破曉辭金殿衝寒出玉京中天日漸午西嶺雪初晴雲  
護園陵迴沙鋪輦路平先朝舊臣子哀感不勝情

昌平州道中

歲晚昌平道肩輿百里程天臨赤縣近雪擁玉河平紫  
塞燕山路黃花漢將營壯哉此形勝坐遣萬方清

曉發昌平州

州據西山勝門臨北闕尊關河千里鎮煙火萬家邨積  
雪容猶慘初陽景漸溫平生請纓志還擬扣天閤

端陽前一日省中即事

梅天雨初霽煙景尚依稀曲檻搖新綠高簷送落暉吏  
從宮漏散鳥向御林歸來日滄江上龍舟競欲飛

端陽後一日同省中諸丈遊陳戚畹別墅

自憐詩骨懶朝參乞假登臨喜盍簪綠樹團陰多映水

青山入曉半浮嵐坐中冠蓋人爭羨物外煙霞性所耽  
對景渾忘身是客依稀風物似江南

喜甥韓進士存良入館選

郎君早歲即知名十載風塵祇自驚綵筆昔看稱獨步  
玉堂今喜冠羣英九重天向詞壇近五色雲從相國生  
少小同遊幸同宦一緘聊展渭陽情

夏日同省中諸丈遊鄭氏山莊

谷口人何在空餘別業存幽牕多鳥迹芳徑半苔痕掃

石供棋局催花送酒樽  
投閒此佳會暫遠市朝喧

贈別王工部年丈改授南曹

送君南去鳳凰臺  
江上秋風待客來  
雲樹暮連青嶂遠  
渚花寒映錦帆開  
六朝舊蹟千年在  
萬里長江一帶迴  
莫謂留都近閒散  
先皇曾此屈羣材

秋晚有懷吳中故人

向晚長安道  
秋風思故人  
十年鷄肋味  
終日馬蹄塵  
目送天邊鳥  
心懸湖上蓴  
山中舊相識  
安得更相親

茅山道中喜晴

積雨初收曙色分三山如畫斂輕雲花殘紫陌聞鶯語  
草長青郊走鹿羣本擬登臨同謝傳還期齋宿禮茅君  
華陽洞口神仙宅霞彩常成五色文

七夕

今夕何夕火西流處處穿針閨女牛銀燭光搖書幌冷  
碧梧影落帝城秋疎愚欲乞天孫巧迂遠空懷杞國憂  
坐久宴然清不寐絳河如練近南樓



過徐相國舊宅有感

相國門前鞍馬稀  
古槐斜帶夕陽微  
蟬聲滿樹秋風早  
寂寞朱簾燕雀飛

贈別李侍御謫廬州

漢世風裁說李膺  
看花曾伴曲江行  
一朝誤落城狐計  
千古應傳驄馬名  
淮海秋添遷客思  
廬江水似使君清  
休因去國違初志  
天子垂衣本聖明

秋日都門送別有感

金人集卷一  
為送南歸客翻憐北駐人白雲凝望遠華髮共愁新落  
日湖南橘秋風江上尊何時返初服吾亦任吾真

送董太僕歸省華亭

十年抗節戍蠻荒仗劍歸來鬢未蒼赤膽朝天時共矚  
錦衣歸畫里生光秋高淮海鴻飛遠月滿華亭鶴唳長  
知向故園晨省處好將萊綵慰高堂

重陽日與諸省丈都門晚集

帝里逢佳節冠裳續勝遊登高千古事清賞片時秋雨

後金英綻杯中玉液浮醉餘扶上馬明月在簾鉤

月夜醉歸漫興

雨過天街夜氣清醉看明月逐人行更傳宮闕銅壺漏  
風送關山玉笛聲逆旅長年淹宦跡故鄉終日計歸程  
扁舟未遂江湖興蓴菜鱸魚空復情

潞河舟中夜坐二首

夜泊潞河驛朔風時送寒濤聲走沙磧月色映江干獨  
酌意何遠高吟興未闌南歸歲云暮白髮擬承歡

金史四庫全書  
卷一  
暫解朝簪去還乘官舫行長風催客去孤月向人明行  
跡隨蓬轉歸心逐鴈征皇恩容乞假無復用陳情

楊村夜泊

維舟楊柳渡沙白亘長天犬吠孤村月烏啼落木煙微  
名真物外清賞足樽前秉燭還深坐宵分尚未眠

曉發天津舟中有感

蓬牕簾影弄朝暉晨起遲遲懶著衣老去不知筋力改  
閒來時覺鬢毛稀望中煙樹鄉心遠到處風波宦況微

擬向五湖尋舊業  
蕭然松竹待人歸

靜海道中晚眺

向晚滄洲道  
舟行落照邊  
殘霞寒映水  
衰柳暮連天  
風靜布帆捲  
潮平錦纜牽  
客途可乘興  
沽酒用青錢

流河道中阻風

阻風蘆葦岸  
獨坐自通宵  
沙近寒聞鴈  
溪深夜落潮  
林昏煙景翳  
波湧月光搖  
客路瀕危險  
令人魂暗消

晚發興濟縣

蘭舟經海縣薄暮喜微風草帶寒煙白川迎落照紅殘  
雲歸遠戍孤鳥沒晴空無限東歸思憑欄一望中

夜泊安林

路出安林晚煙生野渡昏挑燈拈彩筆待月舉蘭樽帙  
散蠹魚走船驚宿鷺喧客心歸轉急飛夢到家園

德州夜坐達旦

倚櫂雄州夜欲闌燈前重整鷄冠星垂碧落懸珠綴  
月委澄波走玉盤鷄唱忽傳更漏盡烏啼驚拂曉霜寒

客心日夜東歸急對景翻嫌行路難

武城懷古

昔賢曾試宰茲地尚絃歌俗帶遺風古城臨流水多琴  
堂虛夜月祠屋長春蘿未暇薦蘋藻其如仰止何

臨清晚眺

地據京南勝州臨濟北雄河山齊魯舊風俗古今同煙  
柳連天碧霜楓夾岸紅到來維短櫂沽酒夕陽中

開河驛夜坐

金匱口八  
卷一  
秋深仗劍出京華此夕經行汶水涯柳下酒香停客櫂  
渡頭燈白近漁家天高風送溪聲遠夜久簾垂月影斜  
醉後欲眠還起坐忍聽哀雁落寒沙

舟中夜雨

輕舟依野渡短褐坐深更千里鄉關思孤燈夜雨聲酒  
衝愁未散詩與夢俱清翻憶朝參日泥塗倩馬行

留城懷古

夜泊古留城河流接漢清昔人不可作茲地只留名祠



帶寒煙色庭多落葉聲  
功成輕萬戶千載仰高情

阻淺境山夜坐

百里彭城道舟行滯淺沙  
波涵珠斗動樹帶絳河斜  
興到杯浮白更深燭吐花  
歸途已過半潦倒憶京華

暮抵境山

風帆飛驛路野燒動寒原  
霧翳林光黑煙籠水氣昏  
遠天收落景新月露微痕  
沙岸停橈處時聞鷄犬喧

曉發徐州

曉發彭城驛舟迎水拍隄天連淮樹遠帆拂楚雲低雁  
向平沙起鷄從夾岸啼江鄉行漸遠雅思欲幽棲

經韓信舊城

淮陰城久廢千載憶王孫古木愁雲起荒原落日昏路  
埋荆棘底碑雜蘚苔痕一飯曾圖報能忘返哺恩

夜抵江都

路入維揚郡江空星漢遙漁邨寒映火狹岸夜聞潮雲  
斂瓜洲樹月明揚子橋自來歌舞地無復似前朝

自江都晚抵儀真

孤槎薄暮向江城千里江流一鏡平  
沙岸樹搖寒月影蓬窓風送夜濤聲  
坐翻芸葉移時久閒剪燈花達曙明  
三載離鄉今漸邇漫勞終日計歸程

江上阻風口占

東風吹浪拍船頭江上寒雲繫客愁  
路近家山歸未得夢魂先已到長洲

早行渡江

畫舸風生錦纜開江光遙向日邊來煙消遠岸漁歌起  
水浸長天雁影迴滄海潮平沒洲渚金山雲出護樓臺  
南來風景依然在祇歎年華鏡裏催

嘉禾道中

篷牕隱几夢初殘座上青山帶雨看幾處葦塘鳴翡翠  
誰家竹塢長琅玕煙林日落千村暮水國風生五月寒  
強欲披裘任疎懶扁舟長往弄漁竿

舟次鳳凰山對月有感

鳳凰山下繫孤舟坐愛冰輪湧碧流  
過柳塘涼入夜風生荻渚景疑秋  
鬢華老去知難再心赤年來愧未酬  
十載風霜淹宦轍淒涼風木使人愁

月夜飲養翁相公山館

黃閣辭榮早青山結社新  
不嫌車馬寂轉與鹿麋親  
入戶雲千頃開牕月一輪  
蘭樽頻勸飲吐握意何真

月夜泊千墩

楊柳洲邊夜泊船月光如水散青天  
江村潮長諸溪滿

林壑風生萬籟傳  
桑落杯乾猶強坐  
梅花帳冷不成眠  
良宵如此成虛度  
獨向篷牕檢舊編

舟行三江口占

萬頃滄浪映遠空  
布帆斜掛夕陽紅  
秋來每動江湖興  
擬著荷衣伴釣翁

華蕩晚渡

湖上冥冥落景催  
沙明石淨水縈洄  
殘霞飛映漁舟小  
蘆荻花中蕩漿來

竹梧書舍曉起

紅日三竿睡起遲  
幽棲原與性相宜  
滿庭落葉秋深後  
遶屋寒花興到時  
短褐漫同逋客散  
濁醪擬赴野人期  
一辭京國歸桑梓  
理亂經年總不知

夜泊方橋

橋偃秋波闊  
舟依夕岸斜  
香杭搗村杵  
亂竹護漁家  
霜後楓酣葉  
樽前燭吐花  
江湖足乘興  
無復憶京華

曉發梁谿

曉來風雨暗梁谿客子舟行路欲迷蘆岸近沙頻下雁  
漁村隔水遠聞雞蕭蕭落木連天暝渺渺寒煙拂地低  
自笑百年渾似寄萍蹤一任自東西

舟中苦雨

水國偏多雨篷牕日日陰江聲隨白浪煙景翳青林漁  
父茅茨濕鮫人窟宅深豐凶關國計對此獨沈吟

曉發翫子浦

策馬微行白下過歡迎無奈故人何玉堂學士風流劇



蘭省仙郎逸興多千炬高懸明月夜一樽同醉白雲阿  
別來幾度思君處閒對澄江發浩歌

寒食早行嘉禾道中

半牕殘月送雞聲畫舸輕帆趁曉行楊柳溪橋煙未散  
杏花邨落雨初晴路逢寒食成虛度坐對春山憶舊盟  
自笑狂夫眞潦倒每因風物倍多情

長橋月夜

江城暮雨歇與客坐孤舟月照蘭樽夜風生荻岸秋空

懷千古事因羨五湖遊烈士今何在長橋水自流

夏日訪舊過太倉舟中對月獨酌

蘭舟載琴鶴遠赴故人期碧海潮來疾青天月到遲波  
光簾外動樹影座間移獨酌娛清夜寧愁鬢欲絲

送王司業同年北上三絕

江上西風動客旌故人相對眼俱青一杯贈別休辭醉  
世路於今畏獨醒

望中秋色滿吳鄉君去燕雲路渺茫別後倘承宣室問

好將民困達君王

雨過江城白苧秋  
行看仙客赴瀛洲  
平津延納君侯事  
不似相如已倦遊

雨後獨坐漫興二絕

西風吹雨動微寒  
隱几香消午夢殘  
聞說江湖可乘興  
扁舟散髮弄漁竿

修竹千竿滿架書  
山窓無事稱閒居  
由他世路風波惡  
獨掩柴扉日晏如

金少卿先生集 卷一  
晚過楓橋

落日楓橋路船窓暮雨昏  
秋萍擁沙背霜葉墜離根  
山寺炊煙起江邨宿鳥喧  
臨風思往事獨坐暗消魂

秋日閒居書感

柴扉終日掩苔徑少人過  
中夜涼風發空階落葉多  
感時休浩歎對酒且高歌  
百歲浮生計渾如一擲梭

舟過胥門書感

旭日晴堪愛寒山青不收  
城臨伍相廟水落百花洲  
恥

作依人鳥甘為浪跡鷗有懷千古恨空羨五湖遊

晚過華蕩

歲晚江鄉路風生畫鷁輕坐看山色遠行愛練光明落  
日孤帆影寒沙一雁聲歸途趁明月不必憚宵征

太宜人卧病兼程夜歸

何事促歸心孤舟入夜深霜飛北堂冷日薄西山陰坐  
久時長嘯愁來還獨吟每思斷機訓不覺淚沾襟

平望阻風

風色晚來靜湖光時漸嘉遠山銜落日隔水映殘霞驛  
路船爭聚江橋酒易賒漁樵堪白首空復戀京華

暮雪

江天日暮雪漫漫四野風生玉宇寒幾處柴門煙火寂  
有人僵臥似袁安

雪後

雪後山川景倍嘉東郊初日弄煙霞幽人策蹇來相訪  
為道寒梅已放花

春日與諸親友同過靈殿寺觀梅

古寺梅花發開樽引興長  
賓朋盡嵇阮臺殿自齊梁  
疎影虛禪榻清芬洒客裳  
數杯沈醉後渾欲泛慈航

落梅

二月江村見落梅風飄花瓣玉成堆  
無端醉臥山牕下時有香魂入夢來

春日閒居方子靜過訪

夫君久約在梅花過訪茅堂日未斜  
野店柳長懸酒旆

金匱山房詩集 卷一  
水邨船泊近漁家十年親舊渾如故一旦歡迎興未賒  
少壯同遊今皓首忍將衰鬢客天涯

江邨春暮

三月江邨路韶華已暮春水光晴弄日花氣暖宜人燕  
啄香芹去魚翻碧藻新閒居與花鳥日日自相親

嘗新茶

雷震山原百草長金芽摘得未盈筐  
牕前鼎沸松風暖座上杯浮穀雨香  
對案總堪清客夢入脣猶足沁詩腸



九重聞為求賢渴應擬星馳達上方

春日方司訓過訪

故人頻枉駕相對意俱忘  
門掩青春暮庭閒白晝長  
日蒸花氣重風落燕泥香  
更擬通宵飲陶然入醉鄉

春朝即事

為愛連宵月朝來起較遲  
呼童煮新茗對客了殘棋  
花落清明後鳩鳴穀雨時  
初歸雙燕子似與主人期

晚過陽城湖

放櫂過湖曲波淹落照紅柳煙低度水麥浪遠搖空暝  
色孤篷底閒情一望中舟行時遣興沽酒問漁翁

端陽日對雨小坐

江郭逢端午軒窓風雨涼呼童收藥裏與客醉蒲觴入  
座榴花媚侵衣艾葉香追思當日事賜扇沐恩光

夏日臥病村居

幽棲仍臥病終日掩柴扉竹圃鶯啼倦苔堦客到稀松  
風清入幕梅雨細沾衣向晚諸僮僕西郊種豆歸

秋日寄高大參省丈

當年銓署並為郎此日天涯各一方  
鴈度吳江秋色遠思君不見斷人腸

夏日胥江送客

載酒餉行客江城水拍堤  
鳩呼山雨急龍出澗雲迷  
舟向天涯去帆從樹杪移  
自憐嬰世網不得遂幽棲

贈別張郡理應召北上

英妙終軍蚤棄繻吳中佐郡日懸魚  
秋風祖道仙蹤遠

金匱要略卷一  
滿路棠陰拂使車

贈別張明府二絕

三載羈栖枳棘叢，徵書遠下建章宮。  
雙鳬飛向雲霄去，花縣春來祇自紅。

長洲苑外動征車，去後琴堂月色虛。  
他日懷君無可問，試從江水覓雙魚。

獨酌

扁舟移海曲，獨酌坐篷牕。  
地僻人行少，天高鶴去雙。  
櫂

歌聞別浦帆影落清江俯檻時長嘯雄心未肯降

途中七夕

七夕今宵是時將溽暑收人間青女月天上白榆秋金井梧飄葉銀河月墜鉤吳城方乞巧幾處倚南樓

紫薇花為風雨所傷

庭花爛熳十旬紅絕勝春英二月中底事夜來風雨惡  
胭脂零落粉牆東

秋晚過城南別業

不到城南久秋風動草堂空  
堦梧墜葉別院桂生香  
鳥跡侵書牖蛛絲遶屋梁  
水亭清晏處隨意引壺觴

十四夜與方司訓金進士臨水翫月

翫月秋將半銜杯夜欲分  
瑤臺凝湛露碧落斂微雲  
魄湧中流影輝成五色  
文主人先客醉談笑未全聞

北寺中秋夜感舊

憶昔曾從此地遊月明如水  
正中秋雲消塔影當空落  
風送天香滿院流一瞬忽驚  
同輩少重來猶喜舊僧留

當年風景依然在湖海馳驅欲白頭

贈別宗給舍同年二首

話別移孤櫂江鄉秋色深風帆行客思杯酒故人心波  
漾殘霞影山銜落日陰醉餘將綠綺誰復是知音

仙客去京華歸期正及瓜天高溫省樹秋老禁園花擬  
向青蒲伏寧為白筆誇頗思同志者潦倒在天涯

東樓曉起

小樓人靜夜冥冥庭樹秋高玉露零獨臥駕余偏覺冷

半窓殘月酒初醒

送丁明府同年之任陽信

江湖秋水闊載酒餉丁鴻客去青天外帆飛落照中琴  
堂吟夜月花縣領春風別後思東魯絃歌處處同

月下復抵婁城燈下獨酌

長嘯篷牕興頗濃燈前獨酌自從容寒潮向晚迴青海  
皓月通宵挂玉峰風度疎林聲淅淅煙籠衰柳影重重  
夜深鼓角城邊起醉夢虛疑長樂鐘



贈別馮進士之任海陽

江鄉水遶闔閭城歲晚憐君嶺外行  
萬里風塵緣五斗一帆煙雨動雙旌  
路經梅嶺花爭發秋向琴堂月正明  
聞說潮陽近滄海鱸魚應避使君清

曉渡漕湖

陰雨三冬後湖田一望平風生帆勢疾  
日出浪花明野鶴摩霄迴沙鷗狎水輕  
篷牕獨凝眺坐覺晏然清

雨窓與客夜話

一局殘棋夜未央  
寒窓風雨客聯牀  
靜聽簷溜和愁滴  
閒剔燈花引話長  
村巷煙昏鴉滿樹  
湖田水汎雁無梁  
何人肯倡蠲租議  
躍馬馳封入建章

曉起與客同汎琴川

蚤起乘殘月相攜有故人  
共登青雀舫遠過白鷗津  
海色侵牕曙霜華拂袂新  
坐忘軒冕慮落魄任吾真

鯤溟詩集卷一

欽定四庫全書

鯤溟詩集卷二

明 郭諫臣 撰

月夜東歸

雀舫乘潮發搖搖日暮歸入春新釀熟漸老故人稀  
臨水心如洗看雲思欲飛停舟天漸暝月色映荷衣

春日約方司訓同看梅花

不見故人久悠悠繫我思每當明月夜正是憶君時  
野

金八二  
卷二  
寺梅初發官橋柳欲垂扁舟共清賞幸不負幽期

春遊靈殿寺

野寺梅開後蕭條客到稀白雲當戶滿香雪繞空飛荒  
蘚春來合殘僧日暮歸為言征稅苦終日掩柴扉

訪金文學次韻題壁

故人喜我至對客摘園蔬石鼎時烹茗風簷自展書君  
今同隱豹予愧未焚魚別去柴荆掩窻前月色虛

春日方司訓過訪留西館夜坐

佳客山中到蘭橈溪上停開軒酒正綠握手眼俱青笑  
語風生席酣歌月滿庭更闌望牛斗遙引少微星

春日過金橋訪友留飲題壁

攜舟閒過陸渾莊繞路名花雨後香十里暖煙迷竹塢  
一篙春水沒魚梁座傾村釀因留久盤摘園蔬引話長  
自是主人能愛客花前同取醉餘觴

春日與王比部陳考功虎邱叙別

勝境頻移棹良朋喜盍簪雲房時送客花徑暫停驂萬

木春藏寺諸峰晚護嵐相逢此清賞具美盡東南

暮春日與客同登虎邱西閣

高閣倚巖西層軒落翠微一簾殘雨盡千頃暮雲飛  
天晚鳥將倦春深花漸稀移樽續勝賞潦倒頓忘歸

春夜步月口占

春雲輕護月香霧煖浮空院鎖鶯花夕林吹燕麥風  
酒憐樽易罄詩苦句難工寒食來朝是村村送落紅

邨居

抱病連朝未破顏  
柴門花落晝常關  
呼童掃室焚香坐  
消受村居一味閒

水南別業

日長庭院午風微  
春遠柴荆客到稀  
久雨園林花亂落  
新晴簾幕燕初飛  
門臨綠水堪垂釣  
坐對青山欲振衣  
屈指當今遊宦客  
重重甲第幾人歸

夜泊南橋移樽橋上翫月

湖上風生席帆收  
月滿船橋臨芳樹  
杪酒送白雲遶春

老花將盡宵分客未眠故人同話舊  
潦倒醉青氍

春晚同登惠山

花落清明後扁舟載酒來山從一徑入寺遶萬松迴池  
上泉聲細樽前暮色催杖頭錢未罄沽取盡餘杯

春日宴宮詹吳公園亭

湖上停蘭櫂仙源此地逢徑幽羣樹合雨過百花濃池  
閣風鳴樹家山雲護峰笑談方竟日明發且從容

夜發陽羨



信宿名園裏揚舠出義興春寒頻對酒夜雨獨挑燈遠  
信時同鶴孤眠近類僧歸途風正好竟夕到毘陵

丹陽與家兄弟舟中叙話

江郭移孤櫂時逢穀雨新鶯花三月暮燕麥萬家春野  
店沽村釀行厨薦渚蘋謝家兄與弟客路更相親

雨後中庭夜坐

槐庭秋雨霽正是納涼時雙闕銀河近千林玉露滋興  
隨清夜發坐為好風移此意無人解惟應達者知

遊昌國寺

古寺空山裏危樓積翠邊講堂凝法雨茶竈散炊煙樹  
引游絲住風隨落絮顛僧家方午餉抱甕汲清泉

晚登大茅峰

西日斜懸句曲峰中天削出玉芙蓉雲歸絕頂迷春岫  
煙起深林翳晚鐘怪石巖前蹲虎豹長松澗底走虬龍  
臨高遙向金陵望王氣千年正鬱蔥

自茅峰回赴丹陽

春山青不了回首望空迷落絮黏蛛網殘紅逐馬蹄人行香霧裏路轉畫橋西為阻連宵雨遊人半未齊

贈孔曲山秀才

稚圭高臥曲山陽千載移文日月光燕雀未知鴻鵠志羽翰一任海天長

毘陵別伊儀部同年北上

春風一棹過毘陵握手忽忽別恨增我欲南還君北上夜深篷底獨挑燈

上巳日與客同登虎邱二首

連朝伏枕因中酒此日登山更舉杯  
芳草已從香徑合殘花猶傍暮春開  
日臨山色當樓滿風度泉聲曲澗迴  
自是遨遊興成癖扁舟湖上許重來

劒池春色綠沾衣把酒登臨入翠微  
幾處歡呼追勝賞一番歌舞竟斜暉  
鶯藏琪樹間關語燕逐楊花高下飛  
上巳風光時正好共君潦倒未須歸

贈王儀部同年分巡東浙

胥江春雨後送客剡溪遊帆向天邊落舟從樹杪浮越  
中新憲節吳下舊風流遙想山陰夜高情屬子猷

池亭月夜遲客不至漫興

山公池上月澄霽似中秋深樹煙初歇晴空水欲流美  
人期不至華館自淹留獨酌仍多興狂吟倚薊維

雨中登蠡東水閣

雨洗園林潤風生水閣寒池荷初起蓋籬筍漸成竿曲  
檻臨花外高窓隱樹端聞來此登眺頓覺眼前寬

山中逢人道姓名因口占一絕

春去猶乘雀舫行  
晚山罨畫半陰晴  
投閒此地頻來往  
休訝山人識姓名

蠡東別業

青郊開別業  
綠水抱孤村  
旭日雞豚散  
芳春竹樹繁  
苔侵蔣詡徑  
雲護辟疆園  
鄰舍香醪熟  
還聞夜扣門

舟中晚眺

涼風天末起  
湖上送歸橈  
返照和煙暝  
殘虹帶雨消  
孤

村時吠犬深樹已鳴蜩坐看東山月相將不待邀

城歸喜雨

晨出望齊門舟前水氣昏遠山雲似墨近郭雨傾盆雷  
電連空起蛟龍出海奔山農俱滿望忭舞徧郊原

池亭雨後

華館開林末新涼生雨餘荷香飄座遠山色逗窓虛避  
俗千竿竹消閒滿架書連朝厭城市來此稱幽居

夏日放舟過蠡東別業

揚舲過蠡口言往習池遊竹徑紅塵遠柴門綠水流一  
樽時遣興竟日可消憂坐久涼風發林塘六月秋

看童子種豆

傍簷時藝豆挿竹便成籬蔓引清風入花凝曉露滋先  
秋涼瑟瑟帶月影離離相對茅茨下幽居興在茲

夏日書齋二絕

香消日正長蟬鳴夢初醒睡起立空堦梧桐落清影  
苦暑忘冠履消閒對奕棋綠陰滿窻戶正好納涼時



池亭望雨不至

江鄉千里早處處桔槔聲樹底蟬鳴晚簷牙鵲噪晴疾  
風吹雨散落日照川明隴上農家子難禁悵望情

蠡東書舍即事

清溪抱村落深樹鎖煙霞客至開三徑閒來共五車涼  
生蒼玉簾風落紫薇花向晚逍遙坐池臺月色賒

江邨雨後

山雨朝來溼滿城郊原無復桔槔聲石牀雲過琴書潤

水檻風生枕簟清  
林駐淡煙迷竹樹  
溪浮新綠遠柴荆  
蠡塘數里荷花發  
還擬扁舟弄晚晴

早秋日書舍

槐庭日正長梧院秋偏早  
風落紫薇花滿地無人掃

早秋日遊王比部園亭

摩詰城南第名園  
枕曲流竹林堪避暑  
梧院早知秋掃徑  
苔痕破開簾樹影  
浮蘭樽同笑語  
竟日此淹留

穆宗登遐書感

聞說君王棄萬幾孤臣千里淚沾衣  
鼎湖此日乘龍去  
蜀地何年化鳥歸  
曉兔空從金殿落  
秋螢時向玉階飛  
遙知弓劍橋山畔  
曙色蒼茫薤露微

邀方司訓同往蠡東別業

已下迎徐榻言遲訪戴舟  
孤村禾黍晚數里蓼花秋  
且莫歸青嶂還來看白鷗  
百年能有幾寧惜片時留

秋日方司訓過訪二首

雨過園林後新涼滿樹梢  
勞君攜杖履訪我扣衡茅  
水

檻橫漁艇松門隱鶴巢故人同笑語塵網暫時拋  
地僻少來客居閒時不冠孤亭浮水面喬木上雲端雨  
滴琴樽潤風清枕簟寒呼僮繫君馬信宿且盤桓

早秋日與客遊虎邱

古寺空山裏聊因避暑來路從松下入門向竹間開深  
樹蟬聲集層軒鳥道迴相將孤月上樽酒許重陪

仰蘇樓晚眺

高閣憑虛起重闌俯翠岑客來原有約雲出自無心黃

葉凝秋思青松礙日陰北牕天欲雨涼氣坐來侵

池亭晚霽

江皋初雨霽涼思襲荷衣喬木生靈籟孤亭送落暉波  
翻菱葉亂露泣豆花肥苔徑閒來合應知過客稀

東樓晚眺

散帙倚東樓川原一望收蟬鳴黃葉寺鳬下白蘋洲落  
日青山外西風古渡頭江鄉景堪愛禾黍萬家秋

池上新構小齋



誅茆營小構，回水敞晴軒。俗駕時堪避，清陰日正繁。  
簾看竹色涉，徑破苔痕客有知音者，頻過不厭煩。

晚泊松陵

掛帆過笠澤，艤棹問鱸魚。古寺垂楊裏，長橋荒蘚煙。  
雲秋壑，冷水月夜船。虛釣雪灘邊，路他年擬卜居。

嘉禾道中

觀潮緣久約，放棹復乘閒。片雨嘉禾外，孤雲笠澤間。  
捲簾看綠水，把酒對青山。雅性耽清賞，扁舟未擬還。

崇德道中喜晴

久雨初開霽天垂別樣青  
風生秋水練雲斂暮山屏疎  
柳官橋路寒花古驛亭遨遊此乘興相對酒俱醒

舟中晚眺

湖上西風錦纜開晴沙白石水縈迴  
蓼花洲轉河橋曲落日漁舟蕩槳來

八月十六日與客同遊西湖

芒屨同上泛湖船萬頃波光一鏡圓  
日映諸峰浮水面

雲扶高塔倚山巔幽花曲渚橫秋色疎柳長堤起暮煙  
準擬今宵明月夜與君潦倒不須眠

謁和靖祠

同上釣魚艇閒登放鶴亭祠臨秋水碧湖帶遠峰青荒  
砌多苔蘚喬松長茯苓遐哉林處士千載仰儀刑

江上觀潮

昨泛湖中棹今登江上臺忽驚滄海內遙駕雪山來勢  
比行天馬聲疑奮地雷鯨翻渤澥動龍激禹門開汜濫



江湖溢奔騰天地迴黃雲凝未散白鳥駭飛回不是瞿  
塘峽虛浮濫瀕堆難忘越人恨空抱伍胥哀弔古應多  
賦臨風愧不才

謁岳廟一首

曾於青史想容儀此日登臨過古祠壯志未能忘北狩  
忠魂猶自倚南枝矢心天地圖恢復唾手燕雲在指麾  
千載英雄常涕淚金牌何事即班師

秋日同王僉憲劉大叅遊石屋洞天仙臺

長松十里路盤旋石屋深藏古洞天林下諸僧閒白日  
空中孤鶴下蒼煙青山社許陶彭澤丹竈砂逢葛稚川  
最愛曲江花裏伴一樽潦倒白雲邊

遊飛來峰

中天飛下青芙蓉峭壁巉巖千萬重仙境霞明金錯落  
洞天雲露玉玲瓏古藤亂繫將崩石老檜雙扶欲墮峰  
海上三山何處是恍然此地或相逢

舟中寄貴州滕憲副同年

憶昔同為選部郎可憐別後各參商一封書寄南飛雁  
萬里隨風到貴陽

秋日過雲間謁少師徐公

江鄉秋色滿東籬相國歸來鬢已絲試問華亭明月夜  
鶴聲誰似漏聲遲

舟發雲間

曉發雲間驛風生水國秋潮痕平兩岸帆影漾中流共  
泛杯中蟻閒看水上鷗何時脫塵鞅蝦菜五湖舟

舟中晚眺

落日低沉閣殘霞倒浸江輕帆晴片片歸鳥暮雙雙酒興隨時發詩魔未肯降閒心對流水獨立倚篷牕

千墩曉發

殘酒初醒後江天欲曙時雞聲催棹發月影逐帆移湖海牽遊興家園入夢思芙蓉花正好似與主人期

崑山晚歸

崑山猶在目挂席又唯亭湖外蘋花白霜前楓葉青檣

烏隨落日水鳥下寒汀歸路天將暮柴門半未扃

送蔣祠部出守高涼

南宮初出守萬里駕星輶報國丹心在辭親白髮饒高涼日漸邇炎海瘴應消握手難為別知君嬾折腰

重陽日與客池亭小飲

江鄉逢令節攜酒醉重陽楓葉經霜變芙蓉近水芳淡煙生竹塢宿雨暗池塘檢點年來事園林日正長

秋夜書齋獨宿

澤國秋將盡書齋夜欲分孤燈懸壁照落葉隔窓聞啼  
月烏栖樹隨風鴈入雲寒衾清不寐耿耿惜離羣

雨中登蠡東水閣

水閣初冬候閒來時獨登雨中聞藥臼林末掛漁曾苔  
暈侵窓長茶煙傍竹凝臨風思無限寂寞曲闌凭

雨後登樓晚眺

雨洗塵氛盡風高朔氣侵凝眸時遠眺抱膝更長吟浩  
蕩乾坤闊淹留歲月深飄然生遐想千載達人心

月夜同諸友小集二首

空林懸片月良夜步清溪野渡煙初起寒原燒欲迷犬  
迎羣客吠鵲遶一枝棲對景偏多興蘭樽月下攜  
寂寞書齋靜柴門喜客過開樽還旅坐對月起高歌樹  
影當堦亂霜華拂袂多酒闌賓客散試問夜如何

城中夜歸

江郭寒鴉暝蓬窓暮色催孤舟連夜發數里帶星回燈  
火沿村起柴扉逐水開草堂人未寢相對共銜杯

晚泊震澤

宴罷司空宅舟迴笠澤濱  
霞明雞候曉沙白鷺迷津  
蝦菜湖鄉味羊裘客路貧  
蓬窓閒立久月色正宜人

曉發磧磯枕上口占

殘酒初醒後寒燈欲滅時  
霜飛蓬戶早月落戍樓遲  
未解聞雞舞徒興夢鹿思  
詩成還穩睡此意少人知

蠡東書館寒夜有懷

別業三冬後書齋五夜長  
風搖銀燭影火燼玉爐香  
古



木鳥棲月晴空雁唳霜寒衾人獨寤耿耿憶鵝行

除夕二絕

澤國今宵歲欲除小齋無寐獨躊躇朝來天子新開歷  
還見春風到草廬

抱戚江鄉六載餘燈前驚歎二毛初平生多少風雲氣  
竹帛勛名半已虛

柳枝詞四首

陌上絲絲帶雨微遙知春傍柳條歸一年一度常如此

昔日章臺今已非

嫋嫋柔條鎖翠煙隨風亂舞綠牕前  
楚王宮裏人多少  
如此腰肢亦可憐

雨織金絲綠未敷  
隔牕偷眼看模糊  
畫眉京兆今何處  
試問雙眉得似無

河橋青眼競窺春  
淡著煙光別樣新  
留却長條休浪折  
春來多少遠行人

早發南行口占

澤國春寒花事遲  
行人臨發又愆期  
今朝放棹梁溪去  
處處東風颭酒旗

舟中晨起

破曉船爭發  
日高人晏眠  
因酣吳市酒  
思煮惠山泉  
鳥去青雲外  
帆飛綠水前  
終朝困塵網  
到此獨悠然

夜宿白土酒家

日落半山陰  
倉忙過客心  
車徒投白下  
燈火近青林  
肆列春盤細  
杯添夜漏深  
兒童進新茗  
端可滌塵襟

路傍折梅戲占

肩輿屈曲傍山溪折得梅花手自攜蜂蝶也知春意在  
隨車直過畫橋西

春日留都

火脫朝簪伏草萊投閒今上鳳凰臺馬前雙闕連雲起  
天外三山聳翠來好鳥偏從名苑集奇花多向上林開  
六朝舊事今何在欲踵風流愧不才

途中寫懷東董司空劉光祿二省丈

潦倒江鄉數載餘姓名久不到公車  
幸承季布千金諾  
更得劉公一紙書  
長揖昔曾容汲黯  
倦遊今已老相如  
饒君肯假吹噓力  
淺薄那能賦子虛

途中有懷靈殿寺梅花三絕

野寺梅開千樹花  
風飄香雪點袈裟  
自憐清賞難消受  
偏到開時不在家

古殿荒涼梅正繁  
春風花滿給孤園  
主人底事忘歸去  
誰遣清香撲酒樽

二月江鄉已落梅  
飛花散作白雲堆  
且拚醉臥山窓下  
疎影還從月下來

雨後登虎邱

蘭舟維細柳與客共攀躋  
山靜花爭發林深鳥亂啼  
羣芳含宿雨雙屐怯春泥  
杯酒論心久危闌日已西

春日過城南別業

放棹城南日未斜  
雨餘百卉競春華  
迎風弱柳垂金縷  
近水夭桃漾錦霞  
魚藻輕翻浮別沼  
燕泥頻掠過東家

生逢佳景須乘興莫遣香塵汙落花

清明日舟次邀方司訓同往西山

寒食江村路門多插柳條市呼新釀熟客喜宿醒消雨  
洗山光潤風生花氣饒故人原有約沙際一停橈

宿西山古菴

落日青山下停舟共訪僧雲低簷外塔香繞佛前燈野  
曠泉聲遠春和花氣蒸偶然逢二妙還許聽三乘

朝發古菴

雞報山窓曉時驚客夢殘蒲團迎日色羅袂怯春寒清  
磬和雲落繁英帶露看舟行更回首高塔出林端

登七十二峰閣夜宿顧山人家

聞說桃源萬樹花遨遊端為惜春華煙霞深閉仙人宅  
魚鳥偏鄰處士家湖面流光浮日去山圍斷處倚雲遮  
杖頭剩有青蚨在綠酒頻沽不用賒

飲陸啓孫含青軒和方司訓韻

地據湖山勝誅茅結小亭簷前芳草綠座上遠山青花



月春遊倦茶煙午夢醒  
蟠蟠來較晚香墜錦雲屏

寒食飲楊氏宅

佳節偏多雨荒村入禁煙  
烏啼歌扇外花落舞筵前  
香霧侵衣薄微風入座偏  
主人能勸飲相對共陶然

登虞山望湖亭

湖霽浮銀鏡山圍列翠屏  
層臺臨拂水曲澗似蘭亭  
鶯語巖花媚龍歸洞草腥  
危闌羣勝集獨坐酒初醒

蠡東前園即事二首

春園門久閉入徑薜蘿封林駐茶煙細衣沾花露濃水  
邊雙白鶴檻外數青松對此幽閒境頻過意未慵

地僻塵氛遠池晴水竹分孤亭明夕照列樹暖春雲戲  
蝶懸蛛網遊魚避鴨羣晚來花下坐漸覺酒微醺

澱山湖中

曉起進蘭橈東行水國饒湖連天共遠日出霧全消獨  
鶴凌風舉羣鷗逐浪飄柳村看漸近青幔映河橋

舟次唐行

江鄉逢暮春一棹艤沙濱客路看飛絮行厨薦綠蘋冠裳時暫遠魚鳥漸相親長嘯乾坤裏悠然著此身

曉發大寺鎮

孤村雞報曙遊子動歸橈河帶明星落煙迎旭日消地卑多近水湖曲不通潮野店香醪熟侵晨向客招

沙湖舟行

昨送春歸去今從湖上來殘雲隨雨盡遠浪拍天迴水鳥驚人沒汀花向客開閒來心境寂無復著纖埃

池館新晴

園林新雨霽嫩綠壓枝繁  
戲蝶穿花舞游魚出藻翻  
清香凝曲檻佳景落幽軒  
獨坐無人到惟聞鳥雀喧

夏日園居寫懷

園徑頻看趣自成  
蕭條終日掩柴荆  
池邊久立諳魚性  
樹底閒行識鳥聲  
過雨林梢凝斷靄  
夕陽霞彩弄新晴  
且將疎懶荒村卧  
浮世誰憐阮步兵

崑山晚歸漫興

百里崑山道歸舟趁晚風霞明千嶂外日落五湖東未  
獲隨仙仗還堪學釣翁深源真可笑忽忽自書空

夏日園居諸親友見訪

幽居掩蓬戶端足避塵囂對酒顏仍破開軒興自饒風  
生香漸遠水近暑潛消故舊攜棋局林間不待邀

晨起遣興

山牕雨過動微涼對鏡俄驚鬢髮蒼堪歎浮生苦無幾  
漢庭空自老馮唐

夏日過城南別業

肩輿久不到城南此日投閒一駐驂  
近水亭臺宜落景  
隔離花竹映澄潭  
窻間遠岫來空翠  
雨後長天正鬱藍  
便欲攜家同此隱  
爐香茗椀事幽探

東宅漫興

宅傍青郊曲盤旋  
竹樹幽石梁空待月  
池館更宜秋雲  
拂堦前樹風清水上樓  
閒來時嘯傲坐覺暑潛收

送馬憲副同年之楚

昔日看花曾作伴  
今晨把袂若為情  
欲知此後相思處  
黃鶴樓前片月明

送錢秀才兄弟應試

吳越神明胄  
相看盡白眉  
共乘木蘭舫  
期折桂花枝  
鄉國凝眸處  
都門燕喜時  
君家兄與弟  
靜聽鹿鳴詩

登上方寺

路入楞伽寺  
明湖映遠峰  
兩崖松檜合  
一徑薜蘿封  
亭逼青霄近  
林藏綠蔭濃  
開樽共吟眺  
煙樹暮重重

行春橋翫月

臨湖維短棹天末起涼風皓月飛銀鏡長橋偃玉虹望  
中煙翳景席畔水涵空勝會知難再酣歌意未窮

新秋夜坐

小庭賓客散獨坐更移時西嶺雲生巧東林月上遲蛩  
聲鳴亂草螢火照疎籬虛館清秋夜幽懷只自知

蠡東晚歸舊宅

薄暮客西歸舟行載夕暉亂蟬悲露切宿鳥渡煙微秋



水逾明鏡殘霞似畫衣  
停橈天漸暝一犬護柴扉

晚發華亭

向晚蘭舟發人牽錦纜行  
日穿雲竇破溪接海潮平  
映水帆檣影投林鳥雀聲  
開簾下堦拜遙想故人情

舟次嘉善縣漫興二首

江郭憐孤往西風灑客裳  
雨晴林葉潤日暖稻花香  
白髮催年邁滄洲引興長  
鱸魚秋正好歸思不能忘

返棹孤城下輕雲近女牆  
槿紅初過雨橘綠未經霜  
景

物看來變浮生祇自忙  
馮唐真易老白首尚為郎

夜泊嘉興城同年戚符卿過訪

訪舊嘉禾郡城頭暮色催水邊孤艇泊燈下故人來  
惠我多新句酬君愧不才何時重放棹同上越王臺

吳江道中二首

雨後松陵道西風吹布袍帆飛秋水濶雁度暮雲高  
野店乞殘火行厨進濁醪微吟殘照裏獨坐檢離騷

揚舲過笠澤回望是姑蘇驛路分南北煙帆半有無孤

城臨巨浸平野插浮圖今夜長橋月清光映玉壺

中秋晚過虎邱

蘭舟初雨霽正值暮鐘時酒為藏闌醉棋堪應劫遲煙  
迷蘭若寺露冷桂花枝月出雲還翳空羣石上期

早發冶場涇

客路宵分後茫茫煙景迷孤舟行載月數里未聞雞白  
露侵帆溼明河向水低棹歌驚夢斷已到蠡塘西

遊桂嶺

西嶺千年桂陰森入翠微瓊枝雲外綠金粟雨中肥影  
落浮杯酒香飄襲客衣當年和露折曾向廣寒歸

贈碧峰上人

古刹深山裏幽棲獨晏公三乘聞已悟五蘊本來空止  
水禪心似孤峰色相同蒲團深歲月龕外雨花紅

遊天池

穿雲躋碧嶺遙望近丹邱雨歇金蓮霽煙涵石屋秋樓  
臺開絕境花竹映清流紅葉蒼山暮停車為爾留

出山

昨朝遠赴野人期  
短棹琴樽帶雨移  
山閣煙霞秋霽後  
法堂燈火夜深時  
竹間共喜高僧話  
石上慚無幼婦詞  
桂嶺天池耽勝賞  
舟人休訝出山遲

竹梧書院晨起

日高三丈遲遲起  
闌干曲曲人頻倚  
秋風落葉滿庭除  
呼童掃葉收梧子

贈伊母太淑人

堂上萱花歲月長  
堦前蘭玉競芬芳  
南宮仙吏稱觴後  
雙袖猶沾粉署香

送近岡吳太守入覲二絕

天皇出御未央宮  
萬國衣冠入覲同  
借問循良誰第一  
漢庭無復過吳公

滿路吳民起頌聲  
願言借寇向承明  
春風三月棠陰下  
多少兒童竹馬迎

送長洲陳明府入覲

朔風吹袂冷鞍馬去京師天外雙鳬遠雲中一鶴隨賦  
先羣邑起績報九重知花縣歸宜早徵書漸及期

夜泊嚴墓鎮燈下聞歌

客路黃昏後移舟近釣磯夜長頻剪燭露冷欲添衣桑  
落浮杯綠車螯入饌肥醉餘聞妙曲響遏白雲飛

吳江道中

言返嘉禾棹時過釣雪灘平湖環縣霽高塔入雲寒沙  
岸蘆花白霜林楓葉丹開簾看旅雁點點落江干

邛晚

細雨孤邛暮呼僮局竹扉牀頭新釀熟座上故人稀野  
寺昏鐘起煙林宿鳥歸有懷清耿耿簷外片雲飛

冬日與客遊西山

孟冬風日煖與客共登山一嶺界天上諸峰隱樹間茶  
花隨地白霜葉滿林斑回首天將暮僧從落照還

舟發婁門夜抵崑山

揚舲過湖曲沽酒近唯亭婁水浮煙白崑山擁縣青亂



鴉棲暝樹飛鳥下寒汀夜傍漁舟宿時聞蝦菜腥

送陸春元北上

閭闔風生白雁高征人寒擁赤霜袍羨君北上陳三策  
愧我南來漸二毛剪燭夜傾桑落酒揚帆時度廣陵濤  
看花上苑春將近不惜臨行贈佩刀

金閨送別晚歸

金閨時送別落日照清樽山近雲常繞天寒水易昏雁  
迷千嶂雨犬吠數家邨歸路休言晚嚴城未掩門

胥江送陳明府入覲兼寄申王韓三內翰二首

送客胥江別微茫煙景分舟前見新月天際斂輕雲風  
有林泉興慚無竹帛勲封書寄朝貴應念久離羣

數載江鄉卧曾無政府書未須嗟失馬久已願焚魚嘯  
傲乾坤闊優游歲月徂故人俱侍從肯憶病相如

蔣雲涯太守自高涼入覲因歸省吳中賦此為贈  
嶺外風塵暗百蠻今朝喜得故人還畏途潦倒心猶壯  
炎海驅馳鬢欲斑歲晏衝寒朝魏闕夜深飛夢繞吳山

歸期屈指春將暮三徑花開白日閒

城中夜歸

日落歸心促天高朔氣凝月明寒渡水煙白夜船燈疎  
懶真堪棄脂韋素未能拙哉蕭狷叟垂老乞為僧

晨起得起官報

懶性甘終棄除書忽漫傳陽烏分樹杪晨鵲噪簷前地  
忝銓衡重心慚水鏡懸皇恩真浩蕩舒眼望青天

晚過天平嶺

數里天平嶺崎嶇石路遙孤雲倚絕壁萬笏擁層霄嵐  
閣衣偏薄寒欺酒易消肩輿歸漸晚落日在林梢

早發青浦

五夜溪塘風雨聲水村雞唱漸天明數杯濁酒醉初醒  
一枕黃粱夢未成篷底捲簾看日出沙邊解纜趁潮平  
揚帆遠向雲間去極目煙江無限情

鯤溟詩集卷二